

FOI Icarus que t'est il aduenus
Tu as tresmal le conseil retenu
De Dedalus ton pere, qui t'apprint
L'art de voler: lequel il entreprint,
Pour eschapper de Minos la prison,
Ou vous estiez enfermez, pour raison
Qu'il auoit fait & basti vne vache
D'vn boys leger, ou Pasiphe se cache.
Ce Dedalus nature surmonta,
A toy & luy des aëles adiousta
Aux bras & piedz, tant que pouiez voler.
Et en volant, il se print à parler
A toy, disant: Mon filz, qui veulx pretendre
De te sauuer, vn cas tu doibs entendre,
Que si tu veulx à bon port arriuer,
Il ne te fault vers le ciel esleuer:
Car le soleil la cire fonderoit,
Et par ainsi ta plume tomberoit.
Si tu vas bas, l'humidite' des eaux:
Te priuera du pouoir des oyseaulx:
Mais si tu vas ne hault, ne bas, adoncques
La voye est seur & sans dangers quelzconques.
O pauvre sot! le hault chemin tu prins,
Trop hault pour toy: car mal il t'en est prins,
La cire fond, & ton plumage tombe,
Et toy aussi, prest à mettre soubz tombe.